



Athchlóite ón doiciméad bunaidh i Márta 2006

Imlitir 24/91

## AN ROINN OIDEACHAIS

**Chuig Cathaoirleach an Bhord Bainistíochta i ngach Scoil Náisiúnta**

### **TUISMITHEOIRÍ MAR CHOMHPHÁIRTITHE SAN OIDEACHAS**

#### **1 TUISMITHEOIRÍ MAR CHOMHPHÁIRTITHE**

Tá sé fógraithe ag an Rialtas gur aidhm polasaí é an chomhpháirtíocht le tuismitheoirí san oideachas. Tríd an gClár Eacnamaíoch agus Sóisialta tá aitheantas foirmiúil tugtha ag an Rialtas agus ag na Comhpháirtithe Sóisialta do chothú páirtíocht tuismitheoirí in oideachas a bpáistí mar straitéis riachtanach do pholasaí agus cleachtas oideachasúil. Chuige sin, tá an Imlitir seo dá cur chugat chun deimhin a dhéanamh de go gcothaíonn gach scoil náisiúnta comhpháirtíocht do thuismitheoirí ar bhealach dearfach ag an leibhéal áitiúil.

#### **2 CAIDREAMH IDIR AN SCOIL AGUS AN TEAGHLACH**

Aontaíonn an Roinn le tuairim Chomhairle Náisiúnta na dTuismitheoirí, an Bhunroinn, faoi mar a nochtar í sa Leabhrán a d'fhoilsigh siad le déanaí *Parents' Associations – Making them Work* gur chóir go mbeadh tuismitheoirí gafa lena scoil áitiúil ar dhá phríomhchúis:

*“Breathnaítear ar an scoil mar fhorleathnú ar an dteaghlach agus is trí chomhpháirtíocht ghníomhach idir tuismitheoirí agus oidí a chuirtear bonn fírinneach faoi seo, go háirithe i súile an té is lárnaí, is é sin an páiste óg.*

*Léiríonn taighde gurb é an tionchar is tábhachtaí ar fhoghlaim pháiste ná suim an tuismitheora agus dearcadh an tuismitheora i leith na scoile, i leith leabhar agus i leith an oideachais.”*

Tacaíonn cinneadh na Comhairle Athbheithnithe don Bhunoideachas leis na cúiseanna seo.

Aithníonn an Roinn go mbaineann tábhacht ar leith le caidreamh idir an scoil agus an teaghlach ag bunleibhéal an oideachais. Ós iad bunoidreachasóirí aitheanta an pháiste iad, tá sé de cheart ag na tuismitheoirí a bheith lán-chinnte go bhfuil an scoil ag riar do riachtanais an pháiste. Tagann de sin go mba chóir an oiread eolais agus is féidir a thabhairt do thuismitheoirí ar gach gné de dhul chun cinn agus d'fhorbairt an pháiste. Ina theannta sin, tá sé de cheart ag tuismitheoirí go comhchoitianta, a fhios a bheith acu an bhfuil an scoil agus an córas oideachais ag riar do riachtanais na bpáistí.

### **3 CUMAINN TUISMITHEOIRÍ**

Aon áit nach bhfuil ceann díobh ann cheana, tá sé den tábhacht go mbunófaí cumann gníomhach tuismitheoirí do gach scoil ar leith d'fhonn comhpháirtíocht éifeachtach dhearfach san oideachas ag leibhéal na scoile a chur chun cinn agus a fhorbairt.

In Imlitir 7/85 a d'eisigh an Roinn Oideachas i mí Eanáir, 1985 spreagadh údarais scoileanna chun féachaint chuige go mbunófaí Cumann Tuismitheoirí i gcomhcheangal le gach Scoil Náisiúnta.

Cé go ndearnadh dul chun cinn suntasach ó shoin, tá scoileanna náisiúnta fós ann nach bhfuil Cumann Tuismitheoirí acu. Ceapann an Roinn go bhfuil Cumann Tuismitheoirí den riachtanas chun:

- comhpháirtíocht do thuismitheoirí san oideachas a fhorbairt ag leibhéal na scoile áitiúla, agus
- tacaíocht agus spreagadh a thabhairt do thuismitheoirí ar leith éirí níos gafa le hoideachas a bpáistí.

Iarrann an tAire Oideachais anois ar gach Bord Bainistíochta pé céimeanna is gá a ghlacadh lena dheimhniú go gcuirfeadh Cumann Tuismitheoirí ar bun i gcomhcheangal leis an scoil. Ba chóir don Bhord gach deis a thapú go gníomhach chun comhoibriú éifeachtach a chur chun cinn idir an scoil agus Cumann na dTuismitheoirí.

### **4 CUMANN TUISMITHEOIRÍ A BHUNÚ**

Mar thúscheim, ba chóir don Bhord mórchrúinniú tuismitheoirí a thionól chun go mbunóidh na tuismitheoirí Cumann Tuismitheoirí, áit nach bhfuil ceann ag feidhmiú cheana. B'ínmhianaithe an run é dá socródh an Bord le Cumann Náisiúnta Tuismitheoirí, an Bhunroinn, go mbeadh ionadaí dá gcuid i láthair chun comhairle a chur ar na tuismitheoirí.

Beidh an Leabhrán *Parents' Associations – Making Them Work* an-chuiditheach do scoileanna atá ag cur páirtíocht tuismitheoirí chun cinn. Chuige seo tá cóip de á seoladh chuig Cathaoirleach gach Boird. Féadfar tuilleadh cóipeanna a cheannach ó *Chumann Náisiúnta na dTuismitheoirí*.

Is chun leasa na scoile é go mbeadh cumarsáid dhearfach idir ionadaithe na dTuismitheoirí ar an mBord agus an Cumann Tuismitheoirí. Chun na críche seo, ba cheart go mbeadh ionadaithe tuismitheoirí ina mbaill de Choiste Chumann na dTuismitheoirí, ex officio.

### **5 COMHPHÁIRTÍOCHT LE TUISMITHEOIRÍ A FHORBAIRT**

Beidh gá le tuilleadh forbartha chun comhpháirtíocht dhearúsach a thabhairt i gcrích ag leibhéal na scoile. Iarrfar ar gach scoil náisiúnta, mar chuid dá plean/polasaí scoile i gcoitinne, polasaí soiléir a chur ar bun chun rannpháirtíocht táirgiúil tuismitheoirí a bhaint amach. Dréachtfaidh an Roinn treoirínthe don phróiseas seo i gcomhairle leis na comhpháirtithe san oideachas. Agus na treoirínthe á n-ullmhú cuirfeadh san áireamh moltaí na Comhairle Athbhreithnithe don Bhunoideachas i dtaca le caidreamh tuismitheoirí le boird bhainistíochta agus oidí, moltaí a nglacann an Roinn leo tríd is tríd.

I dteannta leis na treoirínthe ullmhóidh an Roinn leabhrán eolais do thuismitheoirí faoin soláthar oideachais a dhéantar dá bpáistí agus faoi fheidhmiú an chórais bhunscolaíochta.

### **6 COMHAIRLE NÁISIÚNTA NA DTUISMITHEOIRÍ**

Ba cheart do gach Cumann Tuismitheoirí dianmhachnamh a dhéanamh ar chomhcheangal leis an gComhairle Náisiúnta Tuismitheoirí, an Bhunroinn. Tugann an comhcheangal seo deis agus modh oibre do thuismitheoirí ar mhaith leo cead cainte i mbeartaíocht ar cheisteanna bunoidreachais ag leibhéal náisiúnta. Soláthraíonn an Chomhairle Náisiúnta

Tuismitheoirí ionadaíocht do thuismitheoirí, mar chomhpháirtithe san oideachas, ar chomhlachtaí oideachasúla éagsúla a cheapann an Rialtas. Trína feidhm ionadaíoch tá an Chomhairle ag cuidiú ina bealach luachmhar fhéin le pleanáil lárnach agus le forbairt polasaí san oideachas.

**C.N. Ó LOINGSEACHÁIN  
RÚNAÍ**

**BEALTAINE, 1991.**